

Perkenal penyelesaian pengurusan kekayaan Islam dipertingkat

Perkenal penyelesaian pengurusan kekayaan Islam dipertingkat

Kuala Lumpur: CIMB Islamic Bank Bhd akan memperkenalkan penyelesaian pengurusan kekayaan Islam dipertingkat yang khusus disesuaikan dengan keperluan pelanggan dan melangkaui pertumbuhan kewangan dalam beberapa bulan akan datang.

Ketua Pegawai Eksekutifnya Ahmad Shahrir Mohd Shariff berkata, ini seiring hasrat bank itu untuk memperkasakan pelanggannya dengan penyelesaian patuh Syariah yang direka khusus mengikut keperluan mereka.

"Matlamat kami untuk memudahkan proses ini dengan menjadikannya lebih mudah diakses, berkesan serta bermakna untuk pelanggan. Usaha ini menyaksikan CIMB Islamic mengambil peranan kepimpinan.

"Kami juga komited untuk membangunkan cadangan pengurusan kekayaan Islam yang komprehensif - membolehkan anda mengurus, melindungi, mengembangkan dan mengagihkan kekayaan mengikut cara patuh Syariah dan pada masa sama kekal berpegang kepada nilai diri," katanya pada acara eksklusif Ramadan untuk CIMB Preferred anjuran CIMB Bank dan CIMB Islamic, baru-baru ini.

Majlis itu turut dihadiri Menteri Kewangan II Datuk Seri Amir Hamzah Azizan dan Ketua Pegawai Eksekutif CIMB Group Novan Amirudin.

Selain itu, Ahmad Shahrir berkata aspek pengurusan kekayaan Islam lebih daripada sekadar mengembangkan aset yang ada dan sebaliknya memastikan kekayaan itu suci, dilindungi dan diagihkan mengikut prinsip Syariah.

"Di CIMB Islamic, kami percaya kekayaan lebih daripada sekadar mengumpulkannya. Ia membabitkan bagaimana pengurusannya, dilindungi dan diagihkan dengan cara menegakkan nilai etika dan seiring dengan prinsip Syariah," katanya.